

摘藻堂四庫全書薈要

集部

欽定四庫全書薈要

集部

陳拾遺集卷一至三

臣王杰詳校

詳校官助教臣常循



欽定四庫全書薈要

陳拾遺集目錄

卷一

賦詩

塵尾賦并序

感遇三十八首

觀荆玉篇并序

鴛鴦篇



與東方左史虬修竹篇

并書

奉和皇帝丘禮撫事述懷應制

洛城觀酺應制

白帝城懷古

度荆門望楚

峴山懷古

晚次樂鄉縣

入峭峽安居溪伐木溪源幽邃林嶺相映有奇致焉

宿空舫峽青樹村浦

宿讓河驛浦

入東陽峽與李明府船前後不相及

卷二

詩

西還至散關答喬補闕

知之

還至張掖古城聞東軍告捷贈韋五

虛已

度峽口山贈喬補闕知之王二無競

題贈祀山烽樹上喬十二侍御

題居延古城贈喬十二

薊丘覽古贈盧居士藏用

六首并序

軒轅堂

燕昭王

樂生

燕太子

田光先生

鄒子

郭隗

初入峽苦風寄故鄉親友

贈趙六貞固

二首

答韓使同在邊

東征至淇門答宋叅軍

之問

萬州曉發放舟乘漲還寄蜀中親友

贈嚴倉曹乞推命錄

答洛陽主人

酬暉上人秋夜山亭有贈

酬暉上人秋夜獨坐山亭有贈

酬李參軍崇嗣旅館見贈

酬暉上人夏日林泉

酬田逸人見尋不遇題隱居里壁

東征答朝臣相送

合州津口別舍弟至東陽峽眷然有憶作以示之

居延海樹聞鶯同作

李二書齋

崇嗣

題田洗馬遊岳桔槔

古意題徐令壁

送別出塞

同叅軍宋之問夢趙六贈盧陳二子之作

和陸明府贈將軍重出塞

同旻上人傷壽安傅少府

詠主人壁上畫鶴寄喬主簿崔著作

登薊丘樓送賈兵曹入都

送魏大從軍

送殷大入蜀

落第西還別劉祭酒高明府

別魏四懔

送客

春夜別友人

二首

遂州南江別鄉曲故人

送東萊王學士

無競

送梁李二明府

送魏兵曹使雋州

得登字

江上暫別蕭四劉三旋欣接遇

送別崔著作東征

送別陶七

別李參軍

崇嗣

遇荊州崔兵曹使

遇崔司議泰之冀侍御珪二使

贈別崔司議冀侍御

送崔著作

融

南山家園林木交映盛夏五月幽然清涼獨

坐思遠率成十韻

秋園卧疾呈暉上人

卧疾家園

月夜有懷

于長史山池三日曲水

登澤州北樓宴

夏日遊暉上人房

春日登華觀

羣公集畢氏林亭

宴胡楚真禁所

卷三

表

為人求拜掃表

為程處弼辭流表

為人謝贈物表

三首

為人謝放流表

為人陳情表

謝免罪表

慶皇太子誕表

慶武成殿表

為人慶拜洛表

為人請出家表

和秋景觀競渡詩表

賀慈竹再生表

勸封禪表

勸追尊中山王表

謝追尊魏國大王表

為建安王獻食表

卷四

表

為人讓本官表

為人讓官表

為袁卿讓官表

為人謝父官表

為鄭使君讓官表

為武奉御謝表

為人謝兄官表

為人請免官表

為人謝表 二首

謝衣表

為建安王賀破賊表

為人論軍功表

為人謝借馬表

奏白鼠表

為僧謝講表

謝藥表

為喬補闕論突厥表

卷五

碑文

趙氏碑

封君遺愛碑

續潘尊師碑

張君吏人頌德碑

獨孤丞遺愛碑

楊府君碑

故居士陳君碑

卷六

誌銘 銘

陳公墓誌銘

王府君墓誌

李府君墓誌

高君墓誌

孫君墓誌

高府君墓誌

張氏墓誌

高氏墓誌

堂弟孜墓誌

薛氏墓誌

宇文氏墓誌

陳君碩人銘

燕然軍人畫像銘

冥冥窅冥君古墳記

卷七

表頌文引歌狀詞序

上大周受命頌表

天授九年

大周受命頌

四章并序

國殤文

并序

禡牙文

滎海文

弔塞上翁文

祭孫府君文

為建安王祭苗君文

祭黃州府君文

祭韋府君文

祭宇文夫人文

祭率府孫錄事文

春臺引

寒食集畢

闕

綵樹歌

山水粉圖

復讎議狀

為人誓衆詞

金門餞東平序

梁王池亭宴序

薛大夫山亭宴序

送中嶽真人序

送崔融等東征序

餞陳少府序

送杜司戶序

冬夜宴序

見牛司倉序

錢齊少府序

錢陶七序

別李叅軍序

崔兵曹使讌序

遇冀侍御崔司議二使序

別冀侍御崔司議序

鸞鳥詩序

送崔著作序

送麴郎將使默啞序

馬叅軍相過醉歌序

遇姜主簿序

卷八

奏議

荅制問事

八條

上蜀川安危事

三條

上蜀中軍事

上益國事

上軍國機要事

上軍國利害事

三條

上西蕃安危事

三條

卷九

書

諫靈駕入京書

諫雅州討生羌書

諫刑書

諫政理書

諫用刑書

申宗人冤獄書

諫曹仁師出軍書

卷十

書

為人與遼東書

為人送生口書

為人與諸將書

為人與諸軍州書

答王尚書書

與韋五虛己書

與岑內史啟

上薛令文章啟

附錄

唐書列傳

陳氏別傳

旌德碑

祭文

過學堂覽文集詩

臣等謹案陳拾遺集十卷唐陳子昂撰子昂事蹟具唐書本傳及盧藏用所為別傳唐初

文章不脫陳隋舊習子昂始奮發自為追古
作者韓愈詩云國朝盛文章子昂始高蹈柳
宗元亦謂張說工著述張九齡善比興兼備
者子昂而已馬端臨文獻通考乃謂子昂惟
詩語高妙其他文則不脫偶儷卑弱之體韓
柳之論不專稱其詩皆所未喻今觀其集惟
諸表序猶沿排儷之習若論事書疏之類實
疏樸近古韓柳之論未為非也子昂嘗上書

武后請興明堂太學宋祁新唐書傳贊以為

薦圭璧於房闥以脂澤汙漫之其文今載集

中王士禎香祖筆記又舉其大周受命頌四

章進表一篇請追上太原王帝號表一篇以

為視劇秦美新殆又過之其下筆時不復知

世有節義廉恥事今亦載集中然則是集之

傳特以詞采見珍譬諸蕩姬佚女以色藝冠

一世而不可以禮法繩之者也此本傳寫多

訛脫第七卷闕兩葉據目錄尋之禡牙文崇
海文在文苑英華九百九十五卷弔塞上翁
文在九百九十九卷祭孫府君文在九百七
十九卷又送崔融等序之後據目錄尚有錢
陳少府序一篇此本亦佚英華七百十九卷
有此文今並葺補俾成完本英華八百二十
二卷收子昂大崇福觀記一篇稱武士護為
太祖孝明皇帝此集不載其目殆偶佚脫今

併補入俾操觚揮翰之士知立身一敗遺詒
萬年有求其不傳而不能者焉乾隆四十
一年七月恭校上

總纂官臣紀昀臣陸錫熊臣孫士毅

總校官臣陸費墀

陳拾遺集原序

昔孔宣父以天縱之才自衛返魯乃刪詩書述易道而作春秋數千百年文章粲然可觀者也孔子歿二百歲而騷人作於是婉麗浮侈之法行焉漢興二百年賈誼馬遷為之傑憲章禮樂有老成人之風長卿子雲之儔瑰詭萬變亦奇特之士也惜其王公大人之言溺於流辭而不顧其後班張崔蔡曹劉潘陸隨波而作雖大雅不足然其遺風餘烈尚有典刑宋齊已來蓋顛顛逶迤

陵頽流靡至於徐庾天之將喪斯文也後進之士若上官儀者繼踵而生於是風雅之道掃地盡矣易曰物不可以終否故受之以泰道喪五百歲而得陳君君諱子昂字伯玉蜀人也崛起江漢虎視函夏卓立千古橫制頽波天下翕然質文一變非夫岷峨之精巫廬之靈則何以生此故有諫諍之辭則為政之先也昭夷之碣則議論之當也國殤之文則大雅之怨也徐君之議則刑禮之中也至於感激頓挫微顯闇幽度幾見變化之朕

以接乎天人之際者則感遇之篇存焉觀其逸足駸駸
方將搏扶搖而凌泰清獵遺風而薄嵩岱吾見其進未
見其止惜乎湮厄當世道不偶時委骨巴山年志俱天
故其文未及也嗚呼聰明精粹而淪剝貪叨桀驁以顯
榮天乎天乎吾殆未知夫天焉昔嘗與余有忘形之契
四海之內一人而已良友歿矣天其喪予合採其遺文
可存焉編而次之凡十卷恨不逢作者不得列於詩人
之什悲夫故粗論文之變而為之序至於王伯之才卓

聲之行則存之別傳以繼于終篇云耳黃門侍郎盧藏用撰

欽定四庫全書薈要卷一萬三千六百十二

集部

陳拾遺集卷一

唐 陳子昂 撰

詩賦

麈尾賦

并序

甲申歲天子在洛陽余始解褐守麟臺正字太子司直宗秦客置酒金谷亭大集賓客酒酣共賦座上食物余為麈尾賦焉

天之浩浩兮物亦芸芸性命變化兮如絲之棼或以神
好正直天蓋默默或以道惡彊梁天亦茫茫此仙都之
靈獸固何負而罹殃始居幽山之藪食乎豐草之鄉不
害物而利己每營道而同方何忘形而委代迺化情之
不忘卒果網以見逼受庖割而罹傷豈不以斯尾之有
用而殺身於此堂為君雕俎之羞廁君金盤之實承主
人之嘉慶對象筵與寶瑟雖信美於茲辰詎同歡於時
日客有感而嘆者曰命不可思神亦難測吉凶悔吝未

始有極借如天道之用莫神於龍受戮為醢不知其凶
王者之瑞莫聖於麟遇害於野不知其仁神既不能自
智聖亦不能自知況林棲而谷走及山鹿與野麋古人
有言天地之心其間無巧冥之則順動之則天諒物情
之不異我心又何競於猜矯故曰天之神明與物推移
不為事先動而輒隨是以至人無已聖人不知予欲全
身而遠害曾若浩然而順斯

感遇 三十八首

微月生西海幽陽始化昇圓光正東滿陰魄已朝凝太極生天地三元更廢興至精諒斯在三五誰能徵

右一

蘭若生春夏芊蔚何青青幽獨空林色朱蕤冒紫莖遲遲白日晚嫋嫋秋風生歲華盡搖落芳意竟何成

右二

蒼蒼丁零塞今古緬荒途亭堠何摧兀暴骨無全軀黃沙漠南起白日隱西隅漢甲三十萬曾以事匈奴但見

沙場死誰憐塞上孤

右三

樂羊為魏將食子殉軍功骨肉且相薄他人安得忠吾
聞中山相乃屬放麕翁孤獸猶不忍況以奉君終

右四

市人矜巧智於道若童蒙傾奪相誇侈不知身所終曷
見玄真子觀世玉壺中窅然遺天地乘化入無窮

右五

吾觀龍變化乃是至陽精石林何冥密幽洞無留行古
之得仙道信與元化并玄感非象識誰能測淪冥世人
拘目見酣酒笑丹經崑崙有瑤樹安得采其英

右六

白日每不歸青陽時暮矣茫茫吾何思林卧觀無始衆
芳委時晦鷓鴣鳴悲耳鴻荒古已頽誰識巢居子

右七

吾觀崑崙化日月淪洞冥精魄相交構天壤以羅生仲

尼推太極老聃貴賓冥西方金仙子崇義乃無明空色
皆寂滅緣業亦何成名教信紛藉死生俱未停

右八

聖人祕元命懼世亂其真如何嵩公輩誣謫誤時人先
天誠為美階亂禍誰因長城備胡寇羸禍發其親赤精
既迷漢子年何救秦去去桃李花多言死如麻

右九

深閨觀元化悻然爭朶頤讒說相啖食利害紛疑疑便

便夸毗子榮耀更相持務光讓天下商賈競刀錐已矣
行采芝萬世同一時

右十

吾愛鬼谷子青溪無垢氛囊括經世道遺身在白雲七
雄方龍鬬天下亂無君浮雲不足貴遵養晦時文舒之
彌宇宙卷之不盈分豈徒山木壽空與麋鹿羣

右十一

呦呦南山鹿罹罟以媒和招搖青桂樹幽蠹亦成科世

情甘近習榮耀紛如何怨憎未相復親愛生禍羅瑤臺
傾巧笑玉盃殞雙娥誰見枯城蘖青青成斧柯

右十二

林居病時久水木淡孤清閑卧觀物化悠悠念羣生青
春始萌達朱火已滿盈徂落方自此感嘆何時平

右十三

臨岐泣世道天命良悠悠昔日殷王子玉馬遂朝周寶
鼎淪伊穀瑤臺成故丘西山傷遺老東陵有故侯

右十四

貴人難得意賞愛在須臾莫以心如玉探他明月珠昔
稱天桃子今為春市徒鷓鴣悲東國麋鹿泣姑蘇誰見
鷓鴣子扁舟去五湖

右十五

聖人去已久公道緬良難蚩蚩夸毗子堯禹以為謾驕
榮貴工巧勢利迭相干燕王尊樂毅分國願同歡魯連
讓齊爵遺組去邯鄲伊人信往矣感激為誰嘆

右十六

幽居觀大運悠悠念羣生終古代興沒豪聖莫能爭三
季淪周赧七雄滅秦嬴復聞赤精子提劍入咸京炎光
既無象晉虜紛縱橫堯禹道既昧昏虐世方行豈無當
世雄天道與胡兵吐吐安可言時醉而未醒仲尼溺東
魯伯陽遁西冥大運自古來孤人胡嘆哉

右十七

逶迤勞已久骨鯁道斯窮豈無感激者時俗頽此風灌

園何其鄙皎皎於陵子世道不相容嗟嗟張長公

右十八

聖人不利己憂濟在元元黃屋非堯意瑤臺安可論吾
聞西方化清淨道彌敦奈何窮金玉雕刻以為尊雲構
山林盡瑤圖珠翠煩鬼功尚未可人力安能存夸愚適
增累矜智道逾昏

右十九

玄天幽且默羣議曷嗤嗤聖人教猶在世運久陵夷一

繩將何繫憂醉不能持去去行採芝勿為塵所欺

右二十

蜻蛉遊天地與物本無患飛飛未能止黃雀來相干穰
侯富秦寵金石比交歡出入咸陽裏諸侯莫敢言寧知
山東客激怒秦王肝布衣取丞相千載為辛酸

右二十一

微霜知歲晏斧柯始青青況乃金天夕浩露沾羣英登
山望宇宙白日已西暝雲海方蕩滴孤鱗安得寧

右二十二

翡翠巢南海雄雌珠樹林何知美人意嬌愛比黃金殺
身炎洲裏委羽玉堂陰旖旎光首飾歲蕤爛錦衾豈不
在遐遠虞羅忽見尋多材固為累嘆息此珍禽

右二十三

挈瓶者誰子姣服當青春三五明月滿盈盈不自珍高
堂委金玉微縷懸千鈞如何負公鼎被紋笑時人

右二十四

玄蟬號白露茲歲已蹉跎羣物從大化孤英將奈何瑤
臺有青鳥遠食玉山禾崑崙見玄鳳豈復虞雲羅

右二十五

荒哉穆天子好與白雲期宮女多怨曠層城閉蛾眉日

耽瑤臺

臺一作池

樂豈傷桃李時青苔空萎絕白髮生羅帷

右二十六

朝發宜都渚浩然思故鄉故鄉不可見路隔巫山陽巫
山綵雲沒高丘正微茫佇立望已久涕落霑衣裳豈茲

越鄉感憶昔楚襄王朝雲無處所荆國亦淪亡

右二十七

昔日章華宴荆王樂荒淫霓旌翠羽蓋射兕雲夢林
竭來高唐觀悵望雲陽岑雄圖今何在黃雀空哀吟

右二十八

丁亥歲云暮西山事甲兵羸粮匱邛道荷戟爭羌城嚴
冬嵐陰勁窮岫泄雲生昏暄無晝夜羽檄復相驚攀躅
競萬仞崩危走九冥籍籍峰壑裏哀哀冰雪行聖人御

宇宙聞道泰階平
肉食謀何失
藜藿緬縱橫

右二十九

竭來豪遊子
勢利禍之門
如何蘭膏美
一作感激自生

冤衆趨明所
避時棄道猶存
雲泉既已失
羅網與誰論
箕山有高節
湘水有清源
唯應白鷗鳥
可為洗心言

右三十

可憐瑤臺樹
灼灼佳人姿
碧華映朱實
攀折青春時
豈不盛光寵
榮君白玉墀
但恨紅芳歇
彫傷感所思

右三十一

索居獨幾日炎夏忽然衰陽彩皆陰翳親友盡睽違登山望不見涕泣久漣沔宿昔感顏色若與白雲期馬上騎豪子驅逐正蜚蜚蜀山與楚水攜手在何時

右三十二

金鼎合還丹世人將見欺飛飛騎羊子胡乃在峨眉變化固非類芳菲能幾時疲疴苦淪躋憂悔日侵淄眷然顧幽褐白雲空涕洟

右三十三

朔風吹海樹蕭條邊已秋
亭上誰家子哀哀明月樓
自言幽燕客結髮事遠遊
赤丸殺公吏白日報私讎
避仇至海上被役此邊州
故鄉三千里遼水復悠悠
每憤胡兵入常為漢國羞
何知七十戰白首未封侯

右三十四

本為貴公子平生實愛才
感時思報國拔劍起蒿萊
西馳丁零塞北上單于臺
登山見千里懷古心悠哉
誰言

未亡禍磨滅成塵埃

右三十五

浩然坐何慕吾蜀有峨眉念與楚狂子悠悠白雲期時
哉悲不會涕泣久漣沍夢登綏山穴南采平山芝探元
觀羣化遺世從雲螭婉孌時永矣感悟不見之

右三十六

朝入雲中郡北望單于臺胡秦何密邇沙朔氣雄哉籍
籍天驕子猖狂已復來塞垣無名將亭堠空崔嵬咄嗟

吾何歎邊人塗草萊

右三十七

仲尼探元化幽鴻順陽和大運自盈縮春秋迭來過盲
飈忽號怒萬物相分摩溟海皆震蕩孤鳳其如何

右三十八

觀荆玉篇

并序

丙戌歲余從左補闕喬公北征夏四月軍幕次于張
掖河河洲草木無他異者惟有仙人杖往往藂生幽

朔地寒與中國稍異余家世好服食昔嘗餌之及此役也已息意茲味成人有薦嘉蔬者此物存焉輟爾而笑曰始者與此君別不圖至是而見之豈非神明嘉惠欲將扶吾壽也因為喬公昌言其能時東萊王仲烈亦同旅舍聞之大喜甘心食之已旬有五日矣適有行人自謂能知藥者謂喬公曰此白棘也公何謬哉仲烈愕然而疑亦曰吾怪其味甜今果如此喬公信是言乃譏余作採玉篇謂宋人不識玉而寶珉石

也余心知必是猶以獨見之故被奪於衆人乃喟然
嘆曰嗟乎人之大明者目也心之至信者口也夫目
照五色口分五味玄黃甘苦亦可斷而不惑也而路
傍一議二子增疑况君臣之際朋友之間乎自是而
觀則萬物之情可見也感采玉詠作觀玉篇以答之
并示仲烈譏其失真也

鷗夷雙白玉此玉有淄磷懸之千金價舉世莫知真丹
青非異色輕重有殊倫勿信玉工言徒悲荆國人

鴛鴦篇

飛飛鴛鴦鳥舉翼相蔽虧俱來綠潭裏共向白雲涯音
容相眷戀羽翮兩逶迤蘋萍戲春渚霜霰遶寒池浦沙
連岸淨汀樹拂潭垂年年此遊翫歲歲來追隨鳳凰起
丹穴獨向梧桐枝鴻鴈來紫塞空憶稻粱肥烏啼倦永
夕鶴鳴傷別離豈若此雙禽翻飛不異林刷尾青江浦
交頸紫山岑文章負奇色和鳴多好音聞有鴛鴦綺復
有鴛鴦衾持為美人贈勗此故交心

與東方左史虬修竹篇

并書

東方公足下文章道弊五百年矣漢魏風骨晉宋莫
傳然而文獻有可徵者僕嘗暇時觀齊梁間詩彩麗
競繁而興寄都絕每以永歎思古人常恐逶迤頽靡
風雅不作以耿耿也一昨於解三處見明公詠孤桐
篇骨氣端翔音情頓挫光英朗練有金石聲遂用洗
心飾視發揮幽鬱不圖正始之音復覩於茲可使建
安作者相視而笑解君云張茂先何敬祖東方生與

其比肩僕亦以為知言也故感歎雅製作修竹詩一篇當有知音以傳示之

龍種生南嶽孤翠鬱亭亭峰嶺上崇翠烟雨下微冥夜
聞鼃鼠呌晝聒泉壑聲春風正淡蕩白露已清泠哀響
激金奏密色滋玉英歲寒霜雪苦含彩獨青青豈不厭
凝冽羞比春木榮春木有榮歇此節無凋零始願與金
石終古保堅貞不意伶倫子吹之學鳳鳴遂偶雲龢瑟
張樂奏天庭妙曲方千變簫韶亦九成信蒙雕斲美常

願事仙靈駟翠虬
駕伊鬱紫鸞笙
結交羸臺女
吟弄昇天行
攜手登白日
遠遊戲赤城
低昂玄鶴舞
斷續綵雲生
永隨衆仙去
三山遊玉京

奉和皇帝丘禮撫事述懷應制

大君忘自我
膺運居紫宸
揖讓期明辟
謳歌且順人
軒宮帝圖盛
皇極禮容申
南面朝萬國
東堂會百神
雲陞旂常滿
天廷玉帛陳
鍾石和睿思
雷雨被深仁
承平信娛樂
王業本艱辛
願罷瑤池宴
來觀農扈春
卑宮昭夏

德尊老睦堯親微臣敢拜手歌舞頌惟新

洛城觀酺應制

聖人信恭己天命允昭回
蒼極神功被青雲祕籙開
垂衣受金冊張樂宴瑤臺
雲鳳休徵滿龍魚雜戲來
崇恩踰五日惠澤暢三才
玉帛羣臣醉徽章縟禮該
方覩升中禪言觀拜洛迴
微臣固多幸敢上萬年杯

白帝城懷古

日落滄江晚停橈問土風
城臨巴子國臺沒漢王宮
荒

服仍周甸深山尚禹功巖懸青壁斷地險碧流通古木
生雲際歸帆出霧中川途去無限客思坐何窮

度荆門望楚

遙遙去巫峽望望下章臺巴國山川盡荆門烟霧開城
分蒼野外樹斷白雲隈今日狂歌客誰知入楚來

峴山懷古

秣馬臨荒甸登高覽舊都猶悲墮淚碣尚想卧龍圖城
色遙分楚山川半入吳丘陵徒自出賢聖幾凋枯野樹

蒼烟斷津樓晚氣孤誰知萬里客懷古正踟躕

晚次樂鄉縣

故鄉杳無際日暮且孤征川原迷舊國道路入邊城野
戍荒烟斷深山古木平如何此時恨噉噉夜猿鳴

入峭峽

安居溪伐木溪源幽邃林嶺相映有奇致焉

肅徒歌伐木驚櫂漾輕舟靡迤隨迴水潺湲汧淺流烟
沙分兩岸霧島夾雙洲古樹連雲密交峰入浪浮巖潭
相映媚溪谷屢環周路迴光踰逼山深興轉幽麋鼯寒

思晚猿鳥暮聲秋
誓息蘭臺策將從
桂樹遊因書謝親
愛千歲覓蓬丘

宿空舫峽青樹村浦

的的明月水啾啾
寒夜猿客思浩方
亂洲浦寂無喧憶
作千金子寧知九
逝魂虛聞事朱闕
結綬驚華軒委別
高堂愛窺覲明主
恩今成轉蓬去歎
息復何言

宿讓河驛浦

沿流辭北渚結纜
宿南洲合岸昏初
夕迴塘暗不流卧

聞塞鴻斷坐聽峽猿愁沙浦明如月汀葭晦若秋不及
能鳴鴈徒思海上鷗天河殊未曉滄海信悠悠

入東陽峽與李明府船前後不相及

東巖初解纜南浦遂離羣出沒同洲島棲泊異渚濱

品彙

作沿迴風烟猶可望歌笑浩難聞路轉青山合峰迴白

異渚濱

日曛奔濤上漫漫積浪下沄沄倏忽猶疑及差池復兩
分離離間遠樹藹藹沒遙氛地入巴陵道星連牛斗文
孤狄啼寒月哀鴻叫斷雲仙舟不可見遙思坐氛氲

陳拾遺集卷一

欽定四庫全書薈要卷一萬三千六百十三

集部

陳拾遺集卷二

唐 陳子昂 撰

詩

西還至散關答喬補闕

知之

歲蕤蒼梧鳳嘹唳白露蟬羽翰本非匹結交何獨全昔
君事胡馬余得奉戎旃攜手向沙塞關河緬幽燕芳歲
幾陽止白日屢徂遷功業雲臺薄平生玉珮捐歎此南

歸日猶聞北戍邊
代水不可涉巴江
亦潺湲攬衣度函
谷銜涕望秦川蜀
門自茲始雲山方
浩然

還至張掖古城聞東軍告捷贈韋五

虛已

孟秋首歸路仲月旅邊亭
聞道蘭山戰相邀在井陘
屢鬪關月滿三捷虜雲平
漢軍追北地胡騎走南庭
君為幕中士疇昔好言兵
白虎鋒應出青龍陣幾成披
圖見丞相按節入咸京
寧知玉門道翻作隴西行
北海朱旄落東歸白露生
縱橫未得意寂寞寡將迎
負劍空嘆息

蒼茫登古城

度峽口山贈喬補闕知之王二無競

峽口大漠南橫絕界中國藪石何紛紜小山復翕赭遠
望多衆容逼之無異色崔萃半孤斷逶迤屢迴直信關
胡馬衝亦距漢邊塞豈伊河山險將順休明德物壯誠
有衰勢雄良易極邈迤忽而盡決潏平不息之子黃金
軀如何此荒域雲臺盛多士待君丹墀側

題贈祀山烽樹上喬十二侍御

漢庭榮巧宦雲閣薄邊功可憐驄馬使白首為誰雄

題居延古城贈喬十二

聞君東山意宿習紫芝榮滄洲今何在華髮旅邊城還
漢功既薄逐胡策未行徒嗟白日暮坐對黃雲生桂枝
芳欲晚薏苡謗誰明無為空自老含嘆負平生

薊丘覽古贈盧居士藏用六首

并序

丁酉歲吾北征出自薊門歷觀燕之舊都其城池霸
迹已蕪沒一作味矣乃慨然仰歎憶昔樂生鄒子羣賢

之遊盛矣因登薊樓作六詩以志之寄終南盧居士
亦有軒轅遺迹也

軒轅臺

北登薊丘望求古軒轅臺應龍已不見牧馬空黃埃尚
想廣成子遺迹白雲隈

燕昭王

南登碣石館遙望黃金臺丘陵盡喬木昭王安在哉霸
圖悵已矣驅馬復歸來

樂生

王道已淪昧戰國競貪兵樂生何感激仗義下齊城雄
圖竟中天遺歎寄阿衡

燕太子

秦王日無道太子怨亦深一聞田光義匕首贈千金其
事雖不立千載為傷心

田光先生

自古皆有死狗義良獨稀奈何燕太子尚使田生

一作田光

疑仗劍誠已矣感我涕沾衣

鄒子

大運淪三代天人罕有窺鄒子何寥廓謾說九瀛垂興
亡已千載今也則無推

郭隗

逢時獨為貴歷代非無才隗君亦何幸遂起黃金臺
初入峽苦風寄故鄉親友

故鄉今日友歡會坐應同寧知巴峽路辛苦石尤風

贈趙六貞固 二首

回中烽火入塞上追兵起此時邊朔寒登隴思君子東
顧望漢京南山雲霧裡

赤螭媚其彩婉孌蒼梧泉昔者琅琊子躬耕亦慨然美
人豈遐曠之子乃前賢良辰在何許白日屢頽遷道心
固微密神用無留連舒可彌宇宙攬之不足拳蓬蒿久
蕪沒金石徒精堅良寶委短褐閑琴獨嬋娟

答韓使同在邊

漢家失中策胡馬屢南驅聞詔安邊使曾是故人謨廢
書悵懷古負劍許良圖出關歲方晏乘障日多虞虜入
白登道烽交紫塞途連兵屯北地清野備東胡邊城方
晏閉斥堠始昭蘇復聞韓長孺辛苦事匈奴雨雪顏容
改縱橫才位孤空懷老臣策未獲趙軍租但蒙魏侯重
不受謗書誣當取金人祭還歌凱入都

東征至淇門答宋叅軍之問

南星中大火將子涉清淇西林改微月征旆空自持碧

潭去已遠瑤華折遺誰若問遼陽戍悠悠天際旗

萬州曉發放舟乘漲遠寄蜀中親友

空濛巖雨霽爛漫曉雲歸嘯旅乘明發犇橈驚斷磯蒼
茫林岫轉絡驛漲濤飛遠岸孤煙出遙峰曙日微前瞻
未能暇坐望已相依曲直多今古經過失是非還期方
一作方

浩浩征思日駢駢寄謝千金子江海事多違

贈嚴倉曹乞推命錄

少學縱橫術遊楚復遊燕栖遑長委命富貴未知天聞

道沉冥客青囊有秘篇九宮探

一作採

萬象三算極重玄

願奉唐生訣將知躍馬年非因墨翟問空滯至龍川

答洛陽主人

平生白雲志早愛赤松遊事親恨未立從宦此中州主
人亦何問旅客非悠悠方謁明天子清宴奉良籌再取
連城壁三陟平津侯不然拂衣去歸從海上鷗寧隨當
代子傾側且沉浮

酬暉上人秋夜山亭有贈

皎皎白林秋微微翠山靜禪居感物變獨坐開軒屏風

泉夜聲絕

一作雜

月露霄光冷多謝忘機人塵憂未能整

酬暉上人秋夜獨坐山亭有贈

鍾梵經行罷香林坐入禪巖庭交雜樹石瀨瀉鳴泉水

月心方寂雲霞思獨玄寧知人世

舊避諱作代

裏疲病得攀

緣

酬李叅軍崇嗣旅館見贈

昨夜銀河畔星文犯遙漢今朝紫氣新物色果逢真言

從天上落乃是地仙人白壁疑冤楚烏裘似入秦
摧藏多古意歷覽備艱辛樂廣雲雖覩夷吾風未
春鳳歌空有問龍性詎能馴寶劍終應出驪珠會
見珍未及馮公老何驚孺子貧青雲倘可致北海憶
孫賓

酬暉上人夏日林泉

聞道白雲居窈窕青蓮宇品泉流雜樹石室千年古

品泉

作岩泉萬丈流
樹石千年古

林卧對軒窗山陰滿庭戶方釋塵勞事

從君襲蘭杜

酬田逸人見尋不遇題隱居里壁

遊人獻書去薄暮返靈臺傳道尋仙友青囊賣卜來聞
鶯忽相訪題鳳久徘徊石髓空盈握金經閉不開還疑
縫掖子復似洛陽才

東征答朝臣相送

平生白雲意疲薳媿為雄君王謬殊寵旌節此從戎按
繩當繫虜單馬豈邀功孤劍將何託長謠塞上風

合州津口別舍弟至東陽

步趨不及眷然
有懷作以示之

江潭共為客，洲浦獨迷津。
思積芳庭樹，心斷白眉人。
同衾成楚越，別島類胡秦。
林岸隨天轉，雲峰逐望新。
遙遙終不見，默默坐含嚔。
念別疑三月，經途未一旬。
孤舟多逸興，誰共爾為鄰。

居延海樹聞鶯同作

邊地無芳樹，鶯聲忽聽新。
問關如有意，愁絕若懷人。
明妃失漢寵，蔡女沒胡塵。
坐聞應落淚，況憶故園春。

李二書齋

崇嗣

灼灼青春仲悠悠白日昇聲容何足恃榮吝坐相矜願
與金庭會將待玉書徵還丹應有術烟駕共君乘

題田洗馬遊岳桔槔

望苑長為客商山遂不歸誰憐北陵井未息漢陰機

古意題徐令壁

白雲蒼梧來氛氲萬里色問君太平世

舊避諱
作代

栖泊靈

臺側

送別出塞

平生聞高義書劍百夫雄言登青雲去非此白頭翁胡
兵屯塞下漢騎屬雲中君為白馬將腰佩解角弓單于
不敢射天子佇深功蜀山余方隱良會何時同

同宋叅軍之問夢趙六贈盧陳二子之作

曉霽望嵩岳白雲半岵足氛氲含翠微宛如羸臺曲故
人昔所尚幽琴歌斷續變化意無常人琴遂兩亡白雲
失處所夢想曖容光疇昔疑緣業儒道兩相妨前期許
幽報迨此尚茫茫晤言既已失感歎情何一始憶携手

期雲臺與我眉達無濟天下窮獨善其時諸君推管樂
之子慕巢夷奈何蒼生望卒為黃綬欺銘鼎功未立山
林事亦微撫孤一流慟懷舊且睽違盧子尚高節終南
卧松雪宋侯逢聖君驂馭遊青雲而我獨蹭蹬語默道
猶惜征戍在遼陽蹉跎歲再黃丹丘恨不及白露已蒼
蒼遠聞山陽賦感涕下霑衣

和陸明府贈將軍重出塞

忽聞天上將關塞重橫行始返樓蘭國還向朔方城黃

金裝戰馬白羽集神兵星月開天陣山川列地營晚風
吹畫角春色耀飛旌寧知班定遠獨是一書生

同旻上人傷壽安傅少府

生涯良浩浩天命固惇惇聞道神仙尉懷德遂為鄰疇
昔逢堯日夜冠仕漢辰交遊紛若鳳詞翰宛如麟太息
勞黃綬長思謁紫宸金蘭徒有契玉樹已埋塵把臂誰
無託平生固亦親援琴一流涕舊館幾霑巾杳杳泉中
夜悠悠世舊避諱作代上春幽明長隔此歌哭為何人

詠主人壁上畫鶴寄喬主簿崔著作

古壁仙人畫丹青尚有文獨舞紛如雪孤飛曖似雲自
矜彩色重寧憶故池羣江海聯翩翼長鳴誰復聞

登薊丘樓送賈兵曹入都

東山宿昔意北征非我心孤負平生願感涕下霑襟暮
登薊樓上永望燕山岑遼海方湯湯胡沙飛且深峨眉
杳如夢仙子曷由尋擊劍起歎息白日忽西沈聞君洛
陽使因子寄南音

送魏大從軍

匈奴猶未滅，魏絳復從戎。
悵別三河道，言追六郡鴈。
山橫代北，狐塞接雲中。
勿使燕然上，惟留漢將功。

送殷大入蜀

蜀山金碧路，此地饒英靈。
送君一為別，悽斷故鄉情。
片雲生極浦，斜日隱離亭。
坐看征騎沒，惟見遠山青。

落第西還別劉祭酒高明府

別館分周國，歸驂入漢京。
地連函谷塞，川接廣陽城。
望

迴樓臺出途遙烟霧生莫言長落羽貧賤一交情

別魏四懔

轉蓬方不定落羽自驚弦山水一為別歡娛復幾年離
亭暗風雨征路入雲烟還因北山逕一作返歸守東陂田

送客

故人洞庭去楊柳春風生相送河洲晚蒼茫別思盈白
蘋已堪把綠芷復含榮江南多桂樹歸客贈生平

春夜別友人

二首

銀燭吐青烟金樽對綺筵離堂思琴瑟別路繞山川
月隱高樹長河沒曉天悠悠洛陽道此會在何年
紫塞白雲斷青春明月初對此芳樽夜離憂悵有餘清
冷花露滿滴瀝宇簷虛懷君欲何贈願上大臣書

遂州南江別鄉曲故人

楚江復為客征棹方悠悠故人憫追送置酒此南州
平生亦何恨夙昔在林丘違此鄉山別長謠去國愁

送東萊王學士無競

寶劍千金買平生未許人懷君萬里別持贈結交親孤
松宜晚歲衆木受芳春已矣將何道一作何適無令白髮新

送梁李二明府

負書猶在漢懷策未聞秦復此窮秋日芳樽別故人黃
金裝屨盡白首契逾新空羨雙鳬鳥俱飛向玉輪

送魏兵曹使雋州

得登字

陽山淫霧雨之子慎攀登羌笮多珍寶人言有愛憎思
酬明主惠當盡使臣能勿以王陽歎邛道畏陵嶒

江上暫別蕭四劉一旋欣接遇

昨夜滄江別言乖天漢遊寧期此相遇尚接武陵洲結
綬還逢育銜杯且對劉波潭一瀾瀾臨望幾悠悠山水
丹青雜烟雲紫翠浮終媿神仙友來接野人舟

送別崔著作東征

金天方肅殺白露始專征王師非樂戰之子慎佳兵海
氣侵南部邊風掃北平莫賣盧龍塞歸邀麟閣名

送別陶七

黃鶴烟雲去青江琴酒同離帆方楚越渭水復西東
芙蓉生夏浦楊柳送春風明月相思處應對菊花叢

別李叅軍

崇嗣

四十九變化一十三死生翕忽玄黃裏驅馳風雨情
是非紛妄作寵辱坐相驚至人獨幽鑒窈窕隨昏明
咫尺山河道軒窓日月底別離焉足問悲樂固能并
我輩何為爾栖皇猶未平金臺可攀陟寶界絕將迎
戶牖觀天地階基上窅冥自超三界樂安知萬里征
中國要荒內

人寰宇宙縈弦望如朝夕寧嗟蜀道行

遇荊州崔兵曹使

輜軒鳳凰使林藪鷄雞冠江湖一相許雲霧坐交歡興
盡崔亭伯言忘釋道安秋光稍欲暮歲物已將闌古樹
蒼烟斷虛庭白露寒瑤琴山水曲今日為君彈

遇崔司議泰之冀侍御珪二使

謝病南山下幽卧不知春使星入東井云是故交親惠
風吹寶瑟微月憶清真憑軒一留醉江海寄情人

贈別崔司議冀侍御

有道君匡國無機余在林
白雲峨眉上歲晚來相尋

送崔著作

融

薊樓望燕國負劍喜茲登
清規子方秦單戟我無能
仲冬邊風急雲漢復霜稜
慷慨竟何道西南恨失明

南山家園林木交映盛夏五月幽然清涼獨坐思
遠率成十韻

寂寥守窮巷幽獨卧空林
松竹生虛白階庭懷古今
鬱

蒸炎夏晚棟宇悶清陰軒窓交紫靄簷戶對蒼岑鳳蘊
仙人錄鸞歌素女琴忘機委人代閉牖察天心蛺蝶憐
紅藥蜻蜓愛碧潯坐觀萬象化方見百年侵擾擾將何
息青青長苦吟願隨白雲駕龍鶴相招尋

秋園卧疾呈暉上人

幽疾曠日遙林園轉清密疲疴澹無豫獨坐泛瑤瑟懷
挾萬古情憂虞百年疾綿綿多滯念忽忽每如失緬想
赤松遊高尋紫庭一作白雲逸榮吝始都喪幽人遂貞吉圖

書紛滿床山水藹盈室宿昔心所尚平生自茲畢願言
誰見知梵筵有同術八月高秋晚涼風正蕭颯

卧疾家園

世舊避諱
作代上無名子人間歲月賒縱橫策已棄寂寞道

為家卧疾誰能問閑居空物華猶憶靈臺友栖真隱大
霞還丹奔日御却老餌雲芽寧知白社客不厭青門瓜
月夜有懷

美人挾趙瑟御月在西軒寂寞夜何久慙慙玉指繁清

光委衾枕遙思屬湘沅空簾隔星漢猶夢感精魂

于長史山池三日曲水

摘蘭藉芳月祓宴坐迴汀沈澗清流滿歲蕤白芷生金
絃揮趙瑟玉柱弄秦箏巖榭風光媚郊園春樹平烟花
飛御道羅綺照昆明日落紅塵合車馬亂縱橫

登澤州北樓宴

平生倦遊者觀化久無窮復來登此國臨望與君同坐
見秦兵壘遙聞趙將雄武安軍何在長平事已空且歌

玄雲曲銜酒舞薰風勿使青衿子嗟爾白頭翁

夏日遊暉上人房

山水開精舍琴歌列梵筵人疑白樓賞地似竹林禪對
戶池光亂交軒岳翠連色空今已寂乘月弄澄泉

春日登華觀

白玉仙臺古丹丘別望遙山川亂雲日樓榭入烟霄鶴
舞千年樹虹飛百尺橋還疑赤松子天路坐相邀

羣公集畢氏林亭

金門有遺世鼎實恣和邦默語誰相識琴樽寄北窓子
牟戀魏闕漁父愛滄江良時信同此歲晚迹難雙

宴胡楚真禁所

人生固有命天道信無言青蠅一相點白壁遂成冤請
室閑逾邃幽庭草未暄寄謝韓安國何驚獄吏尊

魏氏園亭人賦一物得秋庭萱草

昔時幽逕裏榮耀雜春叢今來玉墀上消歇畏秋風細
葉猶含綠鮮花未吐紅忘憂誰見賞空此北堂中

陳拾遺集卷二

欽定四庫全書薈要卷一萬三千六百十四

集部

陳拾遺集卷三

唐 陳子昂 撰

表

為義興公求拜掃表

臣禍釁所鍾早日孤露坟塋莫掃松柏凋荒臣之不天
實有攸咎死罪死罪昔先臣下世遺訓未忘而殃罰不
圖家禍潛構兄弟無故並為參商中冓之言所不可道

孤臣不孝萬死餘責死罪死罪然臣之負譴實陷無辜

吏議不明以投魑魅自泣血去國寄命南荒歷年被病

再罹

再罹二字疑誤

生死炎山漲海氣瘴窮天戴白之老俗無

聞者孤臣疲薶豈望須臾分謂委骨窮溟餌身魚鼈狼

荒之鬼永悲長逝不意慶雲垂澤天渙宏流拂拭霧露

生見白日踴躍昭泰情何以勝死罪死罪而餘殃未泯

凶禍荐臻亡兄濟江合家淪溺嫂姪俱逝一不生存尋

途未中臣妻又殞重疊亡歿契闊山川至止之日生意

盡矣誓將守死陵墓沒齒家園不圖恩幸曲成寵章仍
及題輿別駕職是恩州再造生涯天實為德死罪死罪
臣自歸日淺塋廟未修荆棘荒然祭祀無主今即便祇
皇命遠職邊夷歲月方賒拜掃何日瞻言出涕感貺崩
摧伏惟陛下仁養羣生孝理天下萬物咸遂各得其宜
臣獨向隅有以長戚伏願天慈愷悌憐憫孤窮寬以簡
書之刑賜其告歸之請使得駿奔西土長號北陵獲申
存沒之悲生謁園塋之樹稽顙松闕謝不睦之辜肉袒

山門祈自新之路刻誓肌骨奉以周旋然後退死蠻夷
沈骸糞土甘心朽滅庶無遺恨倘昊天鑒照孤誠可哀
則臣之鰥生志畢今日不勝崩迫之至

為程處弼辭流表

糞土臣某言臣以殃釁姪構凶逆臣合宗族誅戮以顯
國刑不謂天慈哀矜宥從寬典全臣骸骨生竄遐荒窮
魂再造以崩以躍

中謝

臣聞忠臣事君如子事父窮痛

之至則呼所親何者君父恩深臣子懇切况臣蒙陛下

恩過如子於母今為子不孝為臣不忠長辭闕庭永沒
荒裔悲窮痛恨荼毒誰依即使朽骨埋魂長滅泉壤懇
誠莫展幽翳明恩寔恐隱匿於君不盡臣節明神誅殛
瞑目貽殃輒敢隳列肝心罄竭誠懇殘喘冒死期以少
謝伏惟聖母神皇陛下哀憐垂察

中謝

臣聞犬馬賤畜

尚知主恩草木無心猶感德化臣雖駑獘不足比人負
榮懷恩能無感激臣山東孤賤朝無親故性識愚鈍材
無可堪非能矯跡立方飾行軌物假借名譽為時吹噓

遂得宿衛階墀忝迹郎將勤勞莫紀尸素已多任經十
有三年竟無一階升錄臣之駑劣於此可見而貪冒榮
寵尚不知歸陛下應天受圖恢纂大業又不以臣駑鈍
特見褒昇擢任中郎委以心膺在職未幾即檢校將軍
纔逾一年又加正授未盈三歲貴顯朝端寵渥隆崇莫
與臣比每刻肌骨曉夜思維臣以何功謬私天造超羣
越輩顯赫明朝應由天性專愚守一守直行不負物心
不愧神盡忠事君竭力養母所以聖慈幽鑒曲照懇誠

寵任無疑委同親近不然愚臣何以叨此殊恩臣凶險
罪深母不終養爰初構疾以至終亡天慈再三降醫賜
藥酒脯珍膳繼踵臣門優問殷勤若同親戚臣之母子
何德於天子貴母榮恩禮重疊臣誠不孝至頑至嚚蒙
此恩榮豈無感戴臣愚性為善不願人知非敢自矜用
為僥倖皇天后土實鑒赤心臣往任郎將之日陛下特
以臣貧賜銀及綵臣以天恩非分矜愍賜臣懷戴之心
祈懇冥報遂用於天宮寺寫書造像半為聖人半為老

親臣以君親之恩所宜並報報是當理不合

合疑人知作令

知

自爾造成一無知者臣今日獲罪不合上言實以事君

之心所宜罄盡善惡有隱恐負赤誠恐臣長沒黃泉無

見聖日區區之意安可不陳臣每以陛下恩深微臣命

淺嘗願湮宗滅族獲報萬分何圖誠効未申凶孽先集

逆天反道背德辜恩汚辱門宗虧缺臣節此臣所以推

心泣血仰天號咷長負陛下之恩終無上報之日煩冤

荼毒心肝以糜比者待罪幽囚以殞身碎首為奉陛下

賜書示喻照察臣心所以捧戴偷生假恩殘喘今既蒙
寬法兄弟獲全投竄遐荒甘禦魑魅臣之慶賴復何可
言所恨亡母棄背即遭此禍几延塗炭孤魂杳杳存者
流離亡者哀痛含酸幽顯為世舊避諱作代所悲應由臣不

孝不忠延此禍釁何以面目將見先臣何以心願拜辭
天闕生死無措永訣於今即以某月日部勒妻子奔波
就道即應死滅腐草幽泉伏願聖母神皇陛下至尊寶
神為萬姓加膳天下禔福以祐蒼生壽若南山永永無

極

為宗舍人謝贈物表

三首

草土臣某頓首稽顙臣言今日中使某至奉宣勅旨
以臣母喪贈物若干以結凶事孤臣鞠凶禮辱天贈稽
顙拜命號絕迷圖

中謝

孤臣不天早失父蔭兄弟孤藐

並未成人亡母哀惻鞠育見保不墜于地以及於茲
焚私門幽顯為慶榮忝之望非有始圖陛下親親敦心
末屬憫臣孤賤惠降恩休孤門載昌寔始天造母子之

賴以喜以惶兢兢孤臣未知攸咎陛下又恢大運崇號
徽章時復私臣弟兄超登顯位母子光寵榮養以全豈
臣單微官能及此早逝先沒以為親榮而天不禍臣延
集老母號慙無及荼毒煩冤陛下降哀又見憫悼惠賜
禮物過超典章生榮死哀重疊若此孤臣殘喘胡顏冒
德而臣之迷塞荒謬禮經先遠之期又勞賜問有無之
禮憂若家人天實為之臣復何及即此殞絕期以謝恩
號眺崩鯁伏表迷塞不勝荒迫

第二表

草土臣某

云云

言今日伏奉恩勅以臣亡母初七特

降上宮若干人給使黃門若干并賜物若干段以給護
齋事天恩過禮伏念號惶孤臣殃釁尚未殞滅荼毒如
昨奄將一旬崩號無及肝心糜殞陛下慈惻哀念孤窮
復憂齋祭恐有闕禮既賜束帛支降上宮恩慈再三若
猶未足自國之寵貴未聞此榮草茅孤臣何以堪處不
日銷滅永負聖恩號泣旻天以崩以愬不勝荒迫之至

第三表

草土臣頓首稽顙言伏奉某月日恩勅以臣亡母遷祔特降勅給人夫及車牛服用物若干以護送靈柩至京祇奉恩私頓首崩殞臣未亡滅假息苦廬日月永往奔及先遠荒迷在疚不知禮儀陛下哀矜憫其不逮恐有顛沛憂及亡靈備物象設並自天賜祖載塋送又悉官供威儀在途魂魄光寵行路延佇咸以為榮孤臣窮凶何圖至此天德彌厚殘喘待終泣血扶靈方滅歸路號

感恩造窮絕迷圖不勝號噓戀恩殞絕

為將軍程處弼謝放流表

臣某言臣無教訓家有逆子臣合汚宗滅族以顯國刑
天慈哀矜放從流竄臣為慶賴已是非圖今月遂蒙天
恩以臣所坐流刑特從放釋窮骸枯骨一朝再生踴躍
章惶再崩再殞中謝臣山東孤子朝無親故性識愚魯
非有才能陛下超羣越輩崇以榮寵昔任郎將十有三
年遂無涓塵一階昇錄自陛下踐極謬荷恩私冒寵叨

榮超絕時輩從郎將檢校將軍纔逾一年即加正授皆
從宸眷非有因人寵渥隆崇莫與臣比臣之孤賤榮顯
知慙臣又凶殃積罪甘投魑魅孤負陛下之恩永為遐
荒之鬼肝腦塗地無以微酬豈謂天造曲矜恩及枯骨
收骸溝壑返魄幽泉使魑魅窮魂重生聖日糞土殘命
不滅荒陬荷德戴恩萬死無報不勝感荷再生之慶

為人陳情表

臣門衰祚薄少遭險釁行年三歲嚴父早亡慈母鞠育

衰惇相養臣又疋羸少多疾病零丁孤苦僅得成人老
母憫臣孤蒙恐不負荷教誨師氏訓以義方家貧無資
紡績以給束脩衣褐並出母指臣既無姊妹寡有兄弟
衡門獨立唯形與影母子相視惇惇靡依罹此艱虞歷
二十歲臣稍以成立忝迹朝班薄祿微資始期色養私
情既獲母子相歡殃罰不圖老母見背攀號何及泣血
漣漣于時日月非宜權殯京兆歲序遷速於今某年臣
本貫河東墳隧無改先人丘壟桑梓猶存亡母客居未

歸舊土宿草成列拱樹荒涼興言感傷增以崩咽今卜
居宅兆將入舊塋明年吉辰最是良便除此之際未有
克期臣謬齒王人職在驅役今歲奉使已至居延單行
虜庭絕漠千里臣雖萬死無荅鴻恩恐先朝露有負眷
知伏惟陛下仁隱自天孝思在物哀臣孤苦降鑒幽冥
使臣來年得營葬具斬草舊域合骨先墳保送羈魂獲
申子道烏鳥之志獲遂私情遷窆事畢馳影奔赴雖即
殞歿甘心無憾

謝免罪表

臣某言日月司刑少卿郭某奉宣勅二日以臣所犯特

從放免伏對恩命魂魄飛揚

中謝

臣巴蜀微賤名教未

聞陛下降非常之恩加不次之命授臣草野謬齒衣冠

臣私門祖宗幽顯榮慶豈止微臣一身而已臣宜肅恭

名節上答聖恩不圖誤識凶人坐緣逆黨論臣罪累死

有餘辜肝腦塗地不足塞責陛下弘慈育之典寬再宥

之刑矜臣草莽憫臣愚昧特恕萬死賜以再生身首獲

全已是非分官服具在臣何敢安臣若貪冒寵私覲顏
恩造復塵舊職以玷清猷螻蛄微心實慙面目臣伏見
西有未賓之虜北有逆命之戎尚稽天誅未息邊戍臣
請束身塞上奮命賊庭効一卒之力答再生之施庶陛
下威命綏服荒夷愚臣罪戾時補萬一若臣獲死鋒鏑
為厲犬羊古人結草寔臣懇願不勝大造再生荷戴之
至

為豐國夫人慶皇太子誕表

臣妾某言今日伏承軒宮載誕皇嗣克昌品物咸歡
天人交慶臣妾聞聖人多子祝美於堯年螽羽宜孫稱
道乎周頌自非璿圖配永寶祚靈長何以茂對天休光
紹大業伏惟皇太后陛下星虹授祉月夢延禎餘慶集
於天孫榮光流於帝子玉衣方泰瑤渚增輝某竊寵中
姬承恩外戚塗山之慶既裕于夏臺高禰之祠未陪于
殷薦竊以潢汙之品可享玉庭玄秬之微有芳天獻豈
圖美於豐侈信有厚於由衷敢用擬議蘋蘩精誠菽藿

洗心而薦竊希瑤席之珍潔意而羞以陪金鼎之實謹
獻食若干輿冒黷珎膳沾汙象筵追用慙惶伏表悚灼
為喬補闕慶武成殿表

臣某言臣以今日奉勅於武成殿喚臣入問骨篤祿
等賊請降事臣以愚瞽得踐赤墀對揚天休具奉其狀
天恩特賜臣溫顏又降問云洛陽宮室皆隋朝營制歲
月久遠多有隳頽樓閣內殿凋落者衆補一壞百無可
施功唯此武成確然端立土木丹綵光色如新不知何

故得自如此卿之博識應知其說臣當時造次畧奏其梗槩退而再省未涉萬分臣恭惟聖言緬求神象研幾太極幽贊元符上以稽驗神謀旁以合契冥數信有至道允在於茲臣聞聖人有言曰清明在躬志氣如神嗜欲將至有開必先天降時雨山川出雲此蓋言神應必有其物陛下至尊至神為天下主幸御羣品威統百靈宸居尊嚴品物昭泰自天而祐於是用寧抑臣又聞物之有靈如人之有神神之和暢則支體便利用人繁昌

則物必豐茂所以見其俗知興廢之數觀其氣識盛衰
之由服物猶然况其大者今陛下應天受命括地登樞
先飛名於祕錄終膺圖於寶座今則當千載之運得一
統之元帝氣氤氲祚基於元命皇圖幽藹象顯於天成
夫以德之休明尚被草木化之昭慶且變烟雲况皇皇
真君龍居其極武成合慶土木增榮獨超衆殿夫何足
怪臣聞敬其事者必載其文美其業者必頌其德臣所
恨才非墨妙思乏筆精不能贊揚休祚歌詠聖德臣請

以此事付之史臣億代知神萬載知迷伏願天恩特垂降許

為程處弼慶拜洛表

臣某言臣糞土殘魂合竄荒裔特蒙陛下施再生之德赦萬死之誅起骨九泉同列編戶臣誠萬死無以上答况恩全賤命生在帝鄉伏見陛下至德配天化及草木天不愛寶洛出瑞圖地不藏珍河開秘籙陛下恭承天命因順子來建立明堂式尊顯號成之匪日功若有神

萬國咸歡百靈同慶元正肇祚品物惟新陛下郊祭旻
天總受羣瑞神靈慶戴萬福攸宜斯寔曠古莫聞於今
始見喙飛蠕動莫不歡心臣以糞土窮骸不合輒同朝
賀以古來大禮莫盛於今昔登封泰山七十二主明堂
布政無三數君誠以陛下道冠古今恩溢天地昆蟲草
木猶或相歡况臣久蒙驅策今日又拔死為生溝壑殘
骸而得再造遂得恭聞大禮側聽鴻名臣伏惟宇宙之
中含氣之類蒙恩負德獨臣最甚向非陛下慈造曲被

鴻私臣已灰滅遐荒肝塗邊壤豈得尚存骸骨恭聞聖
慶臣所以匍匐冒死不避誅戮冀申螻蟻之情以同燕
雀之慶然臣自惟罪累不可比人在於禮經尤宜自絕
所以屏營糞土不敢先聞今既萬國禮終百神慶畢昆
蟲鳥獸亦並歡寧故臣螻蟻之誠始敢昧死上賀臣伏
知冒禮違法罪合誅夷臣生見明時預聞嘉慶臣今即
殞滅寔萬死為榮不勝歡踴戴賀之誠

為人請子弟出家表

臣某言臣以險釁私門不造亡父故某官先臣某早先
朝露永謝休明日月不居星紀云暮伏以先臣策名委
質冠帶早年始自解巾即陪軒禁終于結綬累忝榮私
三歷名卿職參於河海八居州牧任叨於股肱而報効
莫聞零落先及啟足之日露首之慚是以臣克奉詔言
志期冥報請以當家子弟三兩人奉為高宗大帝出家
歸道而孤梵在疚遺屬未申奉以哀號寔貫心髓今者
大帝登僊之忌以及茲辰先臣懇誠未效他日所以乞

遂冥願敢覬天恩庶菩提之因發揮于正覺涅槃之證
幽贊於宸階先臣夙心無恨泉壤伏願上天降鑒微誠
可哀因緣獲展存沒交慶不勝崩迫

為陳御史上奉和秋景觀競渡詩表

臣某言伏見某月日御製秋景務餘聊觀競渡故陳先
作式佇來篇凡六韻天文爰降品彙咸亨金簡潛開瑞
圖斯見臣聞白雲興詠漢遊汾水之祠黃竹申歌周舞
瑤池之駕然而志崇遠轍事或勞人故文思之化未光

太清之道攸闕伏惟聖母神皇陛下大虹齊聖感月含
神玄德茂於皇階文明照於天下用能提玉斗挹璿衡
百神景從三靈協贊青雲出洛爰開受命之符赤甲榮
河終御興王之寶非窮神之至德者其孰能與於是哉
既而黃屋務閑紫機時暇洞庭張樂思援軫於軒遊媯
水披圖想同驂於堯輦然遠而勞物者未若近而安人
動而勤已者豈比靜而泰神於是徙金蹕鳴玉鸞清禁
林御池殿肅波神而戒事命舟子為水嬉彩鷁蓮歌乍

起江吳之引青龍桂楫時搖甌越之風鳥逝虬驚沸珠
潭而競逐雲飛電集橫玉浦而流光信可以娛樂性靈
發揮文物皇歡允洽白日俄光於是奏薰風於管絃詠
叢雲於林籞帝歌爰作天藻攸彰黼帳帷宮縉文房之
繡綵祥雲瑞景霏翰苑之榮光信探道於玄包得斯文於
紫極太平允矣元首康哉方欲朝明堂之官受羣后之
瑞尊崇顯號光啟聖圖封玉嵩丘以接千年之統泥金
少室攸增萬歲之規卓哉煌煌聖君之表也微臣曲學

蓬戶竊位蘭臺未聞驄馬之謠非有雕龍之思鞠躬霜
署謬覩于天章逖聽鈞臺側聞於帝樂天文尊貴不遠
於下臣帝寶珍崇曲宣於近貴竊以君唱臣和固不隔
於尊卑宮變商從方允諧於金石輒用齋心扣寂假翰
求詞將以攀日月之末光繼螢爝之微照不勝云
為朝官及岳牧賀慈竹再生表

臣等言臣聞天視自我人視天聽自我人聽故堯臣方
命降震怒之災姬聖尊仁受昭事之福先王乃以恭畏

上下祇奉天人於是有昭德塞違懲惡勸善所以明枉
直正典刑一昨伏奉恩勅宣示司農卿宗晉卿所奏日
者王德壽等承使失旨虐濫無辜災感蝗蟲毒痛慈竹
寧歲為之饑饉眈庶以之流離冤魄冥申玄感上測乃
降明制發德音恤淫刑蠲虐典于是幽魂雪憤遺噍昭
蘇枯竹由其再生蝗蟲為之輟青犢蠶動色瘡癘收氛
當天札之凶年致昇平之稔歲非夫聖靈昭感天人合
符何吉凶之徵報同影響天下幸甚臣等聞聖人法天

所以順物小人違道則必亂常故虞稱欽明嚴四凶之
罪魯有仁義正兩觀之誅所以邦家用昌苛慝不作王
某等色厲內荏心僻行堅弄措刑之文為商夷之法以
訟受服同惡自尤竟招殛竄之辜允肅政刑之序今者
蒼鷹斂翼乳虎含牙朝廷無腹誹之憂天下有刑措之
頌信可以懲殘創酷誘善旌寃永清侮弄之階共登仁
壽之域臣等謬贊臺閣忝守藩維寔思仰奉大猷以穆
中典幸屬至聖崇德小人勿用凡在庶品實百恒歡雖

成康頌聲文景默化刑清政肅曾何足云伏乞書之國
經頒示天下使四方風動萬國歸仁垂範後昆以為世
則臣無任慶抃之至

為赤縣父老勸封禪表

臣聞帝功既久必昭告於上玄无命攸尊必升封於厚
載故七十二主能恢萬代之規三五六經以為百王之
典伏惟陛下應天受命握紀登樞包括乾坤之靈享壽
神明之化故能開天寶闡地珍溫洛所以升圖榮河由

其薦籙羣神既贊衆瑞交馳謳歌於是大歸禮樂以之
咸脩陛下奉順天意允答神休垂顯號以居宸建明堂
而治物百寮惟允萬國咸寧然則嵩岳神宗望玉鑾而
來禪天中僊族佇金駕而崇封寔大禮之昌期膺告成
之茂典况神都為八方之極太室居五嶽之尊陛下垂
統紫微大昌皇運報功崇德允協神心應天順人雅符
靈望皇圖盛業寔在於茲臣等叨預堯封久忘帝力竊
聞聖人封禪天下所以會昌山嶽成功皇壽由其配永

臣等既為陛下赤子陛下又為萬姓慈親實願上報天功下順人望勒成嵩嶽大顯尊名不勝云

云

為永昌父老勸追尊中山王表

臣聞子貴親榮聖人典禮故姬文受命尊太王之名漢祖登宸加上皇之號而皆事美帝籍業盛昌圖臣伏見中山大王道合先天功成佐命昔高祖神堯皇帝義旗爰建大號初興首贊皇基定策京邑用能神驅電掃應天順人龍躍紫微光宅區夏實賴大王之德翼成高祖

之勲開國成家猶未奉答況陛下應天受命協運披圖
正顯位於明堂昭大明于天下功崇五帝業盛三皇可
謂寶極洪名尊崇光大今者追尊之義猶闕於顯陵榮
親之典未聞於帝號臣聞商周革命封杞宋之君春秋
正名美虞晉之祀夫以興王繼絕尚不闕於禮經況乎
大孝尊親豈可虧於祀典臣等食和白屋沐慶玄門幸
為可封之人叨遇永昌之運伏見陛下則天法地崇孝
臨人方且示天下以事親正皇猷以達禮蒼生之慶寔

賴惟新不任區區伏請上中山大王尊號遠以光祖宗之德下以順黎元之望

為百官謝追尊魏國大王表

臣等昨陳愚懇請上魏國大王尊號天慈恩孝降順羣情宇宙咸歡品物知泰

云

臣聞

一人有慶萬國歡心

况乎道洽奉先義光尊號伏惟聖母神皇陛下鑪宮受命寶極披圖以大孝而居尊勤至仁而育物用能光於四海化及萬方緬惟尊祖之儀寔美前王之典宸心載

穆盛百辟之誠求帝冊終開見千年之盛禮蒼昴以之
禋福皇極由其永昌凡在含靈孰不歡慶

為建安王獻食表

臣謬籍葭莩叨榮主社元戎出塞違鳳宸而逾年班師
入朝拜鸞闈而有日而策勛飲至頻承湛露之恩獻壽
奉觴未申行潦之薦所以白茅微藉願享於鈞臺潢汙
菲誠思奉於瑤水謹輒獻食一百舉伏知金鷄瑞鼎盈
上帝之珍羞玉女行厨盡羣仙之品味以茲菲薄有陋

蘋蘩多慙在藻之歡竊有獻芹之志所願皇慈俯納丹
慙獲申天子萬年永慶南山之壽微臣百拜長承北極
之恩無任誠懇之至

陳拾遺集卷三

謹案卷一第四頁後六行豈徒山木壽原本徒訛
圖據唐詩別本改

第十三頁前一行與東方左史虬修竹篇并書原
本作修竹篇脫與東方左史虬六字書訛序今
據唐詩別本改

卷二第四頁後一行贈趙六貞固原本脫貞固二
字據別本增

卷三第十三頁前四行昔登封泰山七十二主原

本二訛四今改

第十五頁後一行青龍桂檝原本桂檝訛檝柱今
改



總校官庶吉士

臣

侍朝

校對官檢討

臣

王鍾健

謄錄監生

臣

王永榮

欽定四庫全書薈要

集部

陳拾遺集卷四
六

詳校官助教臣常循



欽定四庫全書薈要卷一萬三千六百十五

集部

陳拾遺集卷四

唐 陳子昂 撰



為李卿讓本官表

臣某言伏奉月日恩勅依舊授臣中大夫守司農卿臣
枯骨再生更蒙寵命魂魄兢越不知所圖

云

臣寔庸

愚本無名節庇身公族竊軒冕之餘假翼宗枝濫衣冠

之末因循寵服累歷榮班素餐之責每深効拙之勤未
補橫被逆賊徐敬真以私仇架禍誣臣云與叔孝逸交
通逆豎獄官執法寘以極刑臣腰領之誅已甘灰粉泉
壤之魄分隔幽冥不圖天地之恩再生枯骨日月之照
曲被幽泉察臣非辜慙臣無罪不牽文法之議特垂赦
宥之慈螻蟻微軀復得全活自非陛下克明克聖至德
至仁臣之魂骸不保今日臣免死為幸豈敢期榮陛下
重加寵章還臣舊職典司宗伯以睦周親愚臣胡顏敢

冒朝典況臣叔孝逸推使未迴在於愚臣更須待罪安
敢私職以玷國章伏乞天恩照臣愚懇不勝感戴生榮
之至

云

為陳舍人讓官表

臣某言伏奉今日詔書以臣為鳳閣舍人榮命自天
寵章非次祇奉惶越顛沛失圖

中謝

臣以諸生宦不期

達徒以時逢昭泰迹忝周行非有君子瑚璉之材通儒
青紫之秀已得評刑北寺執憲南臺鵬鳩之政無聞驄

馬之榮已極陛下天飛踐祚雲紀命官陽館初開庶政
惟始金章玉式允待其人如臣疲駑宜所遐棄豈圖尚
矜庸劣昭覩欽明任同信臣寵優時輩預參詳於詔獄
叨獎渥於宸階省已循躬實知非分陛下不以榮過其
量職越其才遂欲超絕親賢叅掌樞要司言鳳綽揮翰
龍池愚臣何人敢冒天造臣聞紫機務重青瑣任隆位
非其人政由有闕臣才無經濟識昧典章將何以光贊
帝猷奉揚休命物無異議政允其中臣雖小人必知不

可何況乎君子豈曰能賢伏望妙選時英旁求衆議
曰惟允以弼良圖愚臣懇誠非敢飾讓

為司刑袁卿讓官表

臣某言伏奉某月日勅授臣某官祇拜寵光魂魄飛越
中謝臣聞王者敬慎懋在典刑天下允平取茲廷尉苟
非其任法不虛行臣本庸微名術無紀階緣際會昭遇
盛明謬得揚歷簪薇陪奉鴛鴦綢繆榮祿荏苒平時毫
髮之功無聞於官守素飡之責每積於公朝何嘗不悚

迫惟憂夙夜祇畏而天恩方被寵命仍加復蒙璽誥之
榮驟覩銀章之貴永言非據稽首知慙伏惟神皇陛下
恭已受圖任賢興化方期合符皇極代理天工臣亦何
人敢妨賢路伏見某官某乙弱冠登仕早有能名每以
清白洗心不為寒溫變節誠使榮加天寵職察雲司必
能利用文明哀矜庶獄弼成五教無謝於虞臣載光三
典允諧於周議愚臣暗昧不識大猷請乞以所授官讓
與某官庶使官允其才名不失實聖明有得人之盛愚

臣無冒責之譏實在聖慈鑒非虛謬

為張著作謝父官表

臣某言臣父某守官不謹獲罪自躬犯非清廉法宜不赦實由臣為子不孝使父陷刑天恩不肅嚴科放全首領臣得父子相見已是非圖豈謂天澤無涯更垂休命臣父子兄弟免罪從榮載惶載殞寔慶寔躍中謝臣父子凡品守道幽微天恩矜憫見垂采錄叨承恩幸厠列陪臣自侍奉已來於今十有八載雖業藝無紀勞勩不

聞小心恭勤庶免愆過明明昊天實昭實察不敢有二
不敢有私夙夜兢兢祇惕若厲所以父母兄弟皆荷恩
私叨職謬官並預供奉摩頂至趾豈足上酬愚臣兢兢
實慙實悚不意臣父衰老恃寵忘公貪潤微財取犯朝
憲應是臣不忠不孝事父無良廉恥不羞幾諫有闕遂
使陷於刑法有玷國章臣之萬死無補此責刻肌刻骨
泣血泣天恨負聖恩以媿朝列臣宜代父蒙罪自殞闕
庭不合偷安尚求苟免誠以天波昭洗得更自新所以

忍垢偷生尅躬自勵期効萬一補過酬恩灰軀糜骨以
甘心願伏惟神皇陛下恩同父母矜照懇誠信其赤心
實有罄竭云

為資州鄭使君讓官表

臣某言伏奉月日制以臣為資州刺史恭承靈命祇拜
寵章匪服知慙循榮如失中謝臣學慙名術才乏器能
而實歷逢時金章坐忝題輿佐獄無展驥之庸剖竹專
城闕懸魚之化坐嘯徒積主諾空慙伏惟陛下革命開

基造天立極方且弘宣帝典大啟皇猷而四岳觀風不
虛其任六條班政允屬其才臣疲朽已侵循良久昧將
何式光刺舉允協得人伏願博選英才克諧僉議使人
光共理政洽惟良大周之命惟新愚臣之責攸息其所
讓人具如別狀

為武奉御謝表

臣某言伏奉某月日詔書以臣為尚食奉御肅恭休命
祇拜寵章榮慶既崇慙荷交集臣才虧琢玉學昧籛金

徒以席寵葭莩容光日月叨承雲渥既廣天工而策更
恩昇位非德舉無階而進坐致於青霄有慶方來載光
於朱紱臣聞瑤庭任切攸稱六尚之榮玉食禮尊寔總
八珍之貴臣術慙緣鶴業匪泰龍將何致美瓊芳式和
金鼎鴻私曲被殊寵降臨天命既不可違聖恩允宜祇
戴循涯揣分實非所圖

為王美暢謝兄官表

臣某言臣兄某前某官特蒙恩詔擢授豫州司馬未及

赴任即以某月日改亳州司馬再三策命叨荷恩私在

臣宗門實為慶幸

中謝

臣兄自解巾從仕三十餘年五

為縣宰三遷州佐政皆通顯職實恭勤直道在公有終

始之節平心應物無造次之譽在於周行頗蒙推薦近

屬虺貞構逆惑亂豫州詿誤平人自貽梟滅陛下憫荆

河之俗遭此無辜弔汝墳之人使其昭慶以為奉揚皇

化者必藉其才撫馭窮人者亦資有德臣兄貞固濫承

天獎遷授豫州在於天恩實為超擢今者未及赴任復

降授亳州重疊承恩勳同貶降朝廷體例實亦為尤臣
兄弟叨榮濫竊非據天慈改授不合冒聞但以始者承
恩蒙越抽擢今有何過遂同左遷區區懇誠輒敢祈訴
天澤伏願皇慈有裕降昭獎之恩臣兄竭忠獲展才之
地小臣死日猶生之年

為金吾將軍陳令英請免官表

臣某頓首死罪上言臣聞軍政不臧春秋責帥故楊干
之亂魏絳致職所以國有明賞下無濫功臣幸以常才

文武兼闕始年十八投筆從戎西踰流沙東絕滄海南
征北伐無所不至席寵門緒忝迹軒墀屬高宗崇德深
仁孝理天下以臣祖父兄弟一門五人皆仗節盡忠身
死王事遂超臣不次授原州都督臣時年二十二職兼
五印榮絕一時階緣此恩累忝藩翰持節統部前後八
州皆居塞垣當賊衝要國之重寄莫與臣比雖無長策
卹戎伏胡恭守朝章保完免失屬陛下大聖矜老容愚
不以臣駑怯更加寵命授以青紫遣督幽州林胡構凶

王師出討士馬雲集軍務星繁糧饋戈甲動以億計臣
無田疇鄉導之策又乏杜預度支之才空竭疲單晝夜
不息以勤補拙首尾三年彌縫闕漏幸無憊乏張玄遇
等不謹師律賊得乘機遂敢長驅燕陲深入趙際臣又
無李牧東胡之畧寔愧吳起西河之守使凶狡攸敷遂
擾邊氓論之國憲合刎頸謝罪陛下又不以臣為辜更
授清邊軍副大總管五月恩制六月到軍逆虜天亡臣
又無効至於軍功戰籍叙勲定勞副職日淺未及精數

大兵旋旆王師獻功而漢庭將軍未聞辭第雲中太守
已論增級今乃竊功謬賞有忝朝章忠誠殉節不昭國
議實由臣身濫其職任過其才上不能允副聖心中不
能匡正戎律傍招物議有紊軍容臣罪何逃孰執其咎
伏願乞賜骸骨貶歸私第式清朝序永覩師貞不勝惶
懼○制曰卿出鎮窮塞作牧薊門雖無破陣之功終有
捍城之効且膺巡警未可懸車

為副大總管屯營大將軍謝表二首

臣聞玃狁不恭周王致其大戮將軍失律漢將被其嚴
刑未有逆命驕天而逋釁鼓之罰亡師沮衆遂寬載社
之誅伏惟天冊金輪皇帝陛下肅恭上帝子育羣生萬
國所以宅心百蠻由是屈膝而契丹凶狡敢竊邊陲毒
虐生靈暴殄天物皇兵順伐仗仁義以共行窮寇姦回
憑險阻而猶鬪臣等仁虧聖略智昧詭圖遂以熊羆之
師挫於犬羊之旅誠合結纓軍壘祇罪國章陛下以堯
舜深仁且緩三苗之伐禹湯罪已不與萬方之辜遂得

齒劍餘魂更參授鉞之任死綏之魂復同挾纊之恩四
夷慕義以來蘇三軍感恩而抃舞瘡瘡再起俘馘是圖
將士同心誓雪孟明之恥殤魂共憤思亢杜回之讎臣
等殉義忘身報恩惟死不任感激慶戴云

云

第二表

臣某言伏奉某月日子前赦書赦臣萬死纔削見任官
秩還復本將軍名始慶再生即榮寵命宛轉踴躍感戴
慙惶中謝臣聞鑿門受律本合忘生對敵臨戎殉節唯

死此乃國家恒典軍政嚴科臣妄以庸才謬叨重任不能深圖遠算馘醜推凶以宣廟略之威永息邊人之患屬前軍挫衄士卒奔亡臣後繼驅馳戰鬪交合川谷地險客主勢殊步馬相懸左右受敵決命爭死力盡塗窮遂以羆貅之師衄於犬羊之衆誠宜刎首謝國殺身報恩陛下洪湯禹之仁務寬大之典愚臣同孟明之侶遂免嚴誅白骨再榮丹慙未泯誓將枕戈嘗膽殄逆梟凶躬為士卒之先以雪傷魂之憤肝腦塗地少荅鴻私不

勝荷戴再生榮幸之至

謝衣表

臣今日千騎田楷至伏奉恩勅賜臣紫衫旱衫袴等
一副臣萬死骷骨垂朽蒙榮載戰載殞肝心塗地 中謝

臣以駑朽叨承重任憑奉聖略誅討元凶實合震曜天
威俘斬逆首而智力淺短進退無規被王孝傑陷鋒于
前臣則接戰於後躬先士卒苦鬪山林自辰至酉殺賊
無數崑谷峻狹車乘相闐旋被孝傑敗兵回相衝突逆

賊乘便衆襲臣軍士卒被傷子將多死臣決命爭首陷
陣摧兇日暮兵疲瘡痍相半烏散山谷人無鬪心臣獨
無依遂失師律即欲刎頸陣下委骨顯誠寔恐身死寇
塲未雪國恥所以含垢忍辱圖死闕庭今月六日至幽
州即囚繫獄戶延到戢魄唯待嚴刑湯鑊在前分委灰
土豈謂天慈矜鑒回憲增榮以其伏鎖之魂更辱賜衣
之寵煩冤踊躍載兢載惶泣血嘗膽誓復國讎刻骨刻
肌敢忘天造不勝已死再生感戴欣躍之至

為建安王賀破賊表

臣某言今日得遼東都督高仇須等月日破逆賊契丹孫萬斬等一十一陣露布并捉得生口一百人送至軍前事三軍慶快不勝踊躍臣聞天之所棄雖暴必亡人之共讎在遠彌戮况凶羯遺醜未及犬羊固作孽以招誅自辜恩而取滅伏惟陛下威加四海子育百蠻鬼神尚不敢違凶狡豈能逃罪逆賊萬斬等天奪其魄坐自為殃仇須等謹奉廟謀遠憑國計短兵纔接羣逆銷

亡返風迴烟薰晴掩目此乃天威潛運神道密周豈止
人謀抑由靈助今盡滅殃病孽固折服饑災兼至凋弊日
滋未加天兵應自糜爛臣訓勵士馬今月尅行大軍一
臨凶寇必殄獻俘在即拜闕有期預喜承恩思勝慶賀
為河內王等論軍功表

右金吾衛大將軍兼檢校洛州長史河內郡王臣懿宗
加爵一等勲五轉司賓卿兼羽林大將軍建安郡王攸
宜加爵一等勲七轉臣某等言伏奉月日制書錄臣等

在軍微功特加前件勲封嘉命聿至寵渥載優伏對慙

魂殞首顛越

云

臣聞古者名將先士卒而後身故其

功勸末世庸將窮人力以寵已故其政乖然則簞醪投

河三軍告醉刳印在手萬夫以離夫與衆共功專已獨

利成敗之理興亡繼焉賞者國之大数据不可忽日者

林胡構孽敢亂燕陲陛下徵義兵誅不道天下士庶焱

集星馳皆忘身憂國紆患却難至於躬先矢石血塗草

莽冒艱險歷寒溫氣騰青雲精貫白日誠亦勤矣雖則

聖靈威武逆虜自滅然士卒戮力亦盡其勞今大功未
酬衆議猶在而臣等駑怯猥加先封臣等不能折衝虜
庭還師衽席今坐加茅土之賜以先將士之勤使鷁冠
虎臣將何以勸今戰士留滯於外府軍吏咨嗟於下寮
臣等胡顏敢冒天造夫賞一勸百猶恐未孚利一阻萬
其弊誰救爵命不可以招謗國章不可以假人伏願天
光俯迴昭發軍禮請以臣等前件勛封迴受戰亡人及
立功將士等上以明國之大賞下以雪臣等謬功使人

悅亡勞士感知死然後兵可訓勵賊可誅屠此誠國之
元經不可苟而利者臣等不勝區區

為建安王謝借馬表

臣攸宜言伏奉聖慈勅借臣廐馬四疋星旗方列天馬
忽來祇拜恩榮抃躍兼集臣名慙白馬陣昧青龍仗憑
廟勝之威竊總元戎之首皇師久露凶羯未孚方欲親
負干戈身先士卒金山深入期突厥之功玉壺遂臨叨
得駿之賜昔聞東道今見西來感燕骨而長鳴君恩罔

報向朔雲而驤首躡頓方擒坐馳千里寔愧三軍寵貴
非圖榮多增懼

奏白鼠表

臣某言今月日臣等令中道窮軍總管王孝傑進軍平
州十九日行次漁陽界晝有白鼠入營孝傑捕得籠送
者身如白雪目似黃金頓目跼伏帖若無氣將士同見
皆謂賊降之徵臣聞鼠者坎精孽胡之象穿竊為盜凶
賊之徒固合穴處野居宵行晝伏今白日歸命素質伏

辜天子之徵兆實先露自孝傑發後再有賊中信來不
謀同詞皆云盡滅病死親離衆潰匪朝即夕臣訓兵勵
勇取亂侮亡昔宋尅鮮卑蒼鵠入幕今聖威遠振白鼠
投營休兆同符實如靈契凡在將士孰不歡欣執馘獻
俘期在不遠

為僧謝講表

僧某言一昨預內道場講恩勅殊獎賜有褒稱死罪死
罪其實顓蒙昧于至道徒以早栖真寔委質香緣遂以

濫越殊私光昭寵渥日者法官聞道講賜承恩叨玉塵
之榮預金閨之議遂得對揚真會咫尺天威徒有明恩
卒無幽贊不能絕王倪之問以默夸詞息毗耶之言冥
通得意天休光被曲見稱揚羣議允懷猥忘其陋顧揣
涯分寔覩心顏將何翼亮緇徒發揮玄極以念嘉惠悚
惕惟憂載懷愚瞽而心況知愧無任慚荷之至

謝藥表

臣某言伏奉中使宣勅旨賜貧道藥總若干味肅恭休

命敬受慚惶猥以眇身叨蒙大賚室殊方丈同問疾之
榮施等醫王感能仁之惠雖赭鞭神授未可比其英蕤
赤斧仙圖固已謝其靈氣方將駐茲營魄蠲彼衰疴以
要上品之經將希大年之壽人微惠重荅施何階不勝
云

為喬補闕論突厥表

臣某言臣以顓蒙叨幸近侍陛下不以臣不肖特勅臣
攝侍御史監護燕然西軍臣自違闕庭歷涉秋夏徒居

邊徼無尺寸之功臣識暗劣孤負聖明然臣久在邊隅夙夜勤灼莫不以蕃事為念俾按察之比以突厥離亂事跡參驗委曲窮問往來竊有以得其真莫不自為鯨鯢逋相吞食流離殘餓莫知所歸臣誠愚不識事機然竊以往古之變考驗於今乃知天亡凶醜之時陛下收功之日然臣聞之難得易失者時也易遇難見者機也聖人所貴者去禍於未萌今陛下體上聖之資開太平之化匈奴為中國之患自上代所苦久矣今天降其灾

以授陛下萬代之業在於今時臣請以秦漢以來事跡證明之伏願陛下少留聖聽尋繹省察天下幸甚臣聞始皇之時併吞六國制有天下按劍叱咤八荒犇馳然匈奴彊梁威不能服牧馬河內以侵邊疆始皇赫然使蒙恬將四十萬衆北築長城因以逐胡取其河南之地七百餘里當時燕齊海岱羸糧給費徭役煩苦人以不堪故長城未畢而間左之戍已為其患二世而亡莫不始於事胡也至漢興高祖受命率羣雄乘利便以三十

萬衆窘迫白登七日被圍僅而獲免自是歷呂太后至
孝文帝單于桀驁益凌漢家文帝徒以遜詞致獻金帛
但求其善和而已不敢有圖賈誼所以哭之痛文帝以
天下盛而罕事戎狄以倒懸天下也景帝時邊受其患
于是漢武踐祚以承六代鴻業屬乎文景玄默之化海
內乂安太倉之粟紅腐而不可食內庫之錢貫朽而不
可校財力雄富士馬精彊忿匈奴之驕慢將報先帝之
辱遂使王恢韓安國將二十萬衆以馬邑誘單于師出

徒費竟無毫髮之功於是大命六師專以伐胡為務首
尾三十餘年中國騷然大受其弊至于國用不足軍興
不給課及六畜筭及船車盜賊羣興京師起亂竟不能
制單于之命一日而臣服之漢宗衰殘幾至覆社稷也
故漢武晚年厭兵革之弊乃下哀痛之詔罷輪臺之遊
封丞相為富民侯將以蘇中國也至宣帝代罕復出師
屬匈奴數窮天降其禍虛閣權渠單于病死右賢王屠
耆堂代立骨肉大臣自不相服又立虛閣權渠子為呼

韓邪單于擊殺屠者堂諸名王貴人各自分立為王單于更相攻擊以至大亂殘虐死者計萬億數畜產耗減十至八九人以饑餓相燔燒以求食于是寄命無所諸名王貴人右伊袂訾且渠當戶以下將兵五萬稽首來降於是北方晏然靡有兵革之事直至哀平之際邊人以安臣竊以此觀匈奴之形察天時之變盛衰存亡之機事可見也然則匈奴不滅中國未可安卧亦明矣夫以漢祖之略武帝之雄謀臣勇將勢盛雷電窮兵黷武

傾天下以事之終不能屈一王服一國宣帝承衰竭之後撫瘡痍之人不敢惕然有出師之意然而未有遺矢之費而臣僕乎單于之長者其故何哉蓋盛衰有時理亂有數故曰聖人修備以待時是以正天下如拾遺陛下肅恭神明德動天地今上帝降匈奴之災孽遺陛下之良時不以此時順天誅建大業使時過匈奴復興則萬代為患雖後悔之亦不及矣古語曰天與不取反受其咎今天意厚矣陛下豈可違之哉臣比在同城接居

延海西逼近河南口其磧北突厥來入者莫不一一臣
所委察比者歸化首尾相仍攜幼扶老已過數萬然而
瘡痍羸億皆無人色饑餓道死頗亦相繼先九姓中遭
大旱經今三年矣野皆赤地少有生草以此羊馬死耗
十至七八今所未者皆亦稍能勝致始得渡磧磧路既
長又無好水草羊馬因此重以死盡莫不掘野鼠食草
根或自相食以活俟命臣具委細問其磧北事皆異口
同辭又耆老云自有九姓來未曾見此饑餓之甚今者

因羅僕固都督早已伏誅為亂之元既自喪滅其餘外
小醜徒侵暴自賊耳本無遠圖多獵葛復自相讎人被
塗炭逆順相半莫知所安回鶻諸部落又與金州橫相
屠戮羣生無主號訴嗷嗷臣所以願陛下建大策行遠
圖大定北戎不勞陛下指揮之間事業可致則千載之
後邊鄙無虞中國之人得安枕而卧者豈不在陛下斷
哉且匈奴為中國患非獨秦漢之間臣竊惟先聖時衛
公李靖蓋中國之一老臣徒藉先帝之威用妙勝之策

當頡利可汗全盛之日因機逐便大破虜庭遂繫其侯
王裂其郡縣將六十年于今矣使中國晏然斥堠不警
書之唐史傳之無窮至今天下謂之為神況陛下統先
帝之業履至尊之位醜虜狂悖大亂邊陲皇天遺陛下
以鴻基之時陛下又得復先帝之跡德之大者其何以
加若失此機事以過往使李靖豎子獨成千載之名臣
愚竊為陛下不取也伏見去月日勅令同城權置安北
都護府以招納亡叛扼匈奴之喉臣伏慶陛下見幾于

萬里之外得制匈奴之上策臣聞隗囂言漢光武見事
于萬里之外制敵應變未嘗有遺今陛下超然神鑒遠
照寔所謂聖明之見覩于未形也臣比住同城周觀其
地利又博問諳知山川者莫不悉備其地東西及北皆
是大磧磧确鹵水草不生突厥常所大入道莫過同城
今居延海澤接張掖河中間堪營田處數百千頃水草
畜牧供巨萬又甘州諸屯犬牙相接見所蓄粟麥積數
十萬田因水利種無不收運到同城甚省功費又居延

河海多有魚鹽此可謂強兵用武之國也陛下若調選天下精兵采拔名將任以同城都護臣愚料之不用三萬陛下大業不出數年可坐而取成臣比來看國家興兵但循於常軌主將不進士卒不練徒如驅市人以戰耳故臨陣對寇未嘗不先自潰散遂使夷狄乘利輕於國威兵愈出而事愈屈蓋是國家自過計於敵爾故非小醜能有異圖臣竊以為陛下今日不更為之圖以激勵天下忠勇但欲以今日之兵今日之將異收功於異

域建業於中興則臣之愚蒙必以為未可得也陛下即以突厥為萬代之患則臣所言願加察若以夷狄荒服不臣小人非所敢諫臣今監領後軍某等取某月即度磧去計至某日及劉敬同謹當親按行磧計至彼已來地形及突厥滅亡之勢當審虛實續以聞奏伏願陛下省臣此章為國大計儻萬有一可中者請與三事大夫熟圖議之此亦萬代一時也伏願少留聖意閑暇念之天下幸甚陛下採臣芻蕘臣請執爰先驅為士卒啟行

橫行匈奴之庭歸報陛下臣死之日庶無遺恨不勝云

云

陳拾遺集卷四